



PORTA-VOZ
V GOVERNUNU
KONSTITUSIONÁL



KOMUNIKADU
BA MEDIA

Loron 31 Fulan Maiu Tinan 2013
Dili, Timor-Leste

***Yellow Road Workshop* atu Realiza Mehi ne'e**

Iha fulan Maiu ne'e hala'o ona *Yellow Road Workshop* rua iha Dili. Dahuluk hala'o iha loron 9 no loron 10 fulan Maiu no halibur membru Governu sira, membru Parlamentu Nasionál sira, Direktór-Jeral no Direktór Finansa sira husi ministériu oiain. Atu garante grupu interesadu boot ida hola parte iha eventu ne'e, maka hala'o workshop daruak iha loron 22 fulan Maiu ba setór privadu, sosiedade sivil, parseiru dezenvolvimentu sira, igreja, representante husi distritu sira no grupu sira seluk.

Yellow Road Workshop nu'udar mekanizmu inovadór ida ne'ebé estabeselele atu insentiva inkluziun nasional no permite partisipasiun boot ida iha prosesu elaborasaun orsamentu Timor-Leste nian. Durante sorumutu hirak ne'e partisipante sira identifika, analiza, no diskute prioridade nasional sira no asuntu importante sira seluk ba prosesu konstrusaun nasaun nian.

Atividade ne'e hala'o iha âmbito Planu Estratéjiku Dezenvolvimentu nian - projetu planeamentu nian ba tempu naruk ba Timor-Leste, ne'ebé ho objetivu atu hasa'e situasaun ekonómika no sosiál país nian, hodi dezenvolve, iha dékada rua, husi país ho rendimentu ki'ik ba país ida ho rendimentu médiu ás. Sorumutu rua ne'e hahú ho análize ida kona-ba SWOT (Strengths, Weaknesses, Opportunities and Threats) atu haree hikis fali Potensialidade, Frakeza, Oportunidade no Ameasa sira husi projetu Governu nian sira.

Husi frakeza hirak ne'ebé mak identifika ona, ko'alia liu kona-ba koordenasaun interministerial ne'ebé maka sei fraku no kona-ba konformidade prosesuál husi sistema sira Governu nian, liuliu husi rejime kontratasaun ne'ebé foin dadaun ne'e descentralizadu ona.

Husi oportunidade sira, ko'alia kona-ba reforsu mekanizmu sira ne'ebé mak iha ona hodi utiliza sira ba portál sira transparéncia nian, hodi fortalese kontratasaun ho baze ba iha méritu no kapasidade konstrusaun nian, no hodi utiliza orsamentu ne'ebé mak iha hodi masimiza benefisiu sira ba povu Timor-Leste.

Ikusliu, ameasa sira inklui dezafiu sira mak hanesan: inflasaun, atu garante distribuisaun ne'ebé hanesan ba área rural no urbana sira, dezempregu no minimiza fuga husi rekursu orsamentál sira nian.

Ita iha ne'ebé nu'udar nasaun? Saida mak ita hakarak hetan? Oinsá ita bele hetan prioridade hirak ne'e? Hirak ne'e mak kestaun bázika tolu ne'ebé fó sai iha *workshop* ne'e, ne'ebé hamosu diskusaun naruk ho



Ágio Pereira

+670 7723 0011

agio.pereira@cdm.gov.tl

govtmedia@gmail.com

www.timor-leste.gov.tl

parte interesada sira hotu no dezvoltimentu servisu hamutuk ida, ne'ebé mak artikula planu asaun nian sira ba prazu badak no prazu médiu ho objetivu sira husi Planu Estratéjiku Dezenvolvimentu nian.

Hetan konsensu ba kestaun ida kona-ba levantamento ida ne'ebé boot liután ne'ebé estabese ona ba Rendimentu Sustentável Estimadu tinan-tinan husi Fundu Petrolíferu nian atu investe iha infra-estrutura no dezvoltimentu rekursu umanu sai fundamentál ba diversifikasaun ekonomia nian.

Nune'e, *workshop* ne'e prova ona nu'udar mekanizmu importante ida iha prosesu Konstrusaun Estadu nian no integrante atu alkansa vizaun unifikada ida. Aleinde ida ne'e, *Yellow Road Workshop* ne'e hanesan pasu dahuluk iha prosesu elaborasaun Orsamentu Jerál Estadu nian ba tinan 2014, hodi fornese baze no kontestu ida atu Ministériu, Instituisaun no Setór ida-idak hahú halo planu tinan 2014 nian. Partisipante sira sente satisfeito ho mekanizmu no ho nia partisipasaun konjunta, ne'ebé lori nível foun ida inkluziun nasional nian, unidade no kompriensaun kona-ba papél ida-idak nian iha konstrusaun nasaun nian.

Agio Pereira konsidera katak "prosesu elaborasaun Orsamentu nian tenke partisipativu, hatene no halo parte ba interesada sira ida-idak, ho diskusaun no halo debate beibeik. *Yellow Road Workshop* ne'e hahú prosesu ida ne'e tinan-tinan. Balun sei la konkorda ho rezultadu finál, maibé hotu-hotu tenke konkorda katak prosesu ne'e transparente, justu no inkluzivu. Partisipante hotu-hotu tenke sente orgulhu ba nível integridade no kooperasaun husi ezersísiu tékniku ida ne'e. **FIN**



Ágio Pereira

+670 7723 0011

agio.pereira@cdm.gov.tl

govtlmedia@gmail.com

www.timor-leste.gov.tl